



普濟戰紀

第三冊

リ 9
6255
3



179
6255
3

普法戰紀卷三

南海 張宗良 芝軒 口譯

吳郡 王韜 紫詮 輯撰



法自與普交兵後。僅據普之沙勃勒城。小為得利。而旋為普軍所驅。普入法境。一戰於威申勃。而法之都異將軍陣亡。再戰於瓦士。而法將麥馬韓全軍潰北。三戰於孚卜。而三軍死綏。俘獲傷亡。不可勝計。三城既失。全境皆震。霞交嫩沙厘金門相繼陷沒。於是下有離心。士無鬪志。蓋不必待蔑士師丹之戰。而勢已不可為矣。法國日報勸民激發義忿。宣力王家。舉國興師。以決一戰。且勗以外以衛國。內以保家。朝議增益兵額。先調一千八

普法戰紀卷三

緒道官

百五十八年至一千八百六十三年。退役軍士未經受室者。復出當兵。以備戰。次調通國人民無家室子女者。由二十五歲至三十五歲。皆出為兵。以備守。議加師餉。至一千兆佛狼。特製鈔票二千四百兆。通行國中。諭遣第二隊鐵甲戰艦。再出都華河。擬駛至北日耳曼波羅的海濱。進攻其城。以解蔑士之圍。特輪船所恃者。專在煤炭。法國所產。卽供境中所用。猶或不足。而當軍興之際。不能售諸隣境。蓋按萬國公法。凡值彼此構兵。毋得偏助。有售以軍中所需各物者。卽為違例。不獨器械藥彈為厲禁也。英朝廷亦出示曉諭商民不得載煤出口發售與戰爭之國是以法雖戰艦林立。而未能用之以收其效。此由於始事之鹵莽。臨事之倉卒。志大謀疎。不預儲蓄。遂至束手。不備不虞。不可以師。信

哉。英當普法始交兵時。有商人之牟利者。私載鎗礮藥彈。售於法營。旋為普國所緝。知移書詰責。欲英自是嚴軍器出口之禁。英國廷臣多方辨論。謂此非公法本意。敵國勢不能令商人因是停止貿易。若普國與英商購售。亦不在禁止之例。或彼或此。本無容心。此不得為敵國罪也。法鎮來困。河大將禮布父。以事不可為。欲掛冠辭職而去。西班牙京師。聞法兵敗之警。無不震懼。繕治甲兵。自為保禦。八月十一日。蔑士軍營緝獲普謀士姑耳。乃法國人也。士姑耳本法國來。因河人。故富家子也。普法軍興。遂充偵使。先是於七月十九日。普兵將欲入境。士姑耳往士打拉士卜城。謁見總督兵馬大將軍。離哥律。自白願竭犬馬力。報効國家。鄙人素居於來。因河

濱家貲殷富。平日間以結客爲豪。四方之士趨之如鶩。而於普國將士尤與之往來相稔。蓋河濱正當孔道。普人之出入於其間者。仰余好客之名。無不願交歡於余。但余心常嫉普人以其國勢雄盛。士馬壯強。駸駸然將有圖法之心。故於普人之來。無不陰忌之。而陽納之。冀收爲他日用。今則正其時矣。竊不自揣。願効馳驅入普營。探其軍情。未識將軍之意。有可行否。雕哥律將軍嘉其誠摯。歡然大悅。撫其背曰。子正豪士哉。欲悉普情。舍子將何所用哉。卽與設盟立約。畀以佛狼銀錢一千枚。曰。以此供路途間需用。他日功成。必當厚以相報。士姑耳得銀。隨卽束裝啓程。適往普營。沿途風景。詳書於冊。經大帥麥馬韓營。隨卽入見。既抵普人營中。悉以見聞。

告之普官。由是法軍舉動謀爲。悉爲普人所知。卽籌所以破之之法。而先爲之備。以致法軍在威申勃孚卜瓦士三戰三北。及其由普營回也。在七月二十六日。仍往謁雕哥律將軍。以普營虛實。述於其前。且大言曰。以我所料。普軍不難指日破也。雕哥律喜甚。優賞重賞。命以後若有所聞。再當告我。此時其詭謀猶未露也。嗣於八月十一日。由蔑士外乘小車游行。覘視形勢。回顧躊躇。法軍見而疑之。觀其狀貌魁梧。品格端重。固儼然君子人也。年約四十許。以短視目戴金鏡。軍士竊隨其後。覘其所向。旋以手拍其肩。士姑耳回顧責之曰。汝何以手拍美國人肩乎。軍士以其自言美國人。益異之。遂搜其身畔。於囊底得一官憑焉。朱印粲然。啓觀之。乃普將蘇

厘士奇所昇者。八月六日書於美嫻。文憑中云。茲准携此文憑。人士姑耳。往返於我營之間。各將士勿得阻撓。又搜得金功牌一面。乃普王御賜者也。有一官憑。則係巴甸邦俾亞將軍麾下烈星奇都統所書。軍士因知其人為敵營間諜。自喜得之甚易。遂解往營。官按軍律審辦。旋定以死刑。以警效尤。噫士姑耳以一身間兩國。卒之身僂名辱。徒喪其軀。為人玷笑。彼之自以為巧者。正其拙也。自以為智者。正其愚也。時普法貿易商人互相往來於兩國者。仍居境中。尚無禁阻。法國欲盡逐之出境。恐其或有不靖也。特謀定未即發。普王知其謀。即傳諭法商云。汝等來商余土久矣。必樂我國法度之寬簡。喜我民貿易之公正。今者事會艱難。不無有所顧慮。然

我民與爾。耦居無猜。悅共相處。尚其操業如常。無事遷徙。汝等非違法妄動。我軍必保衛汝身家。一體無異視。慎之毋忽。於是法商無不頌普王之仁。仍旅普境如故。普商之僑寓法京者。一千四百家。至是盡為法人所驅。倉皇轉徙。狼狽道途。普人聞知。咸為不平。前普王鑾馭離沙勃勒時。檄諭法民云。為布告普軍所攻下城邑境內。居住法民事。茲者法王拿破崙。大興水陸諸軍。來攻日耳曼諸國。而我國至今尚思與法民相安無事。惟是逼於時勢。不得不出於戰鬪。用是不穀親統六師。特過法境拒之。我軍雖與法軍戰。然非與法民為難也。若法民不妄攻擊我軍。則我國亦必保其身家。全其性命。茲特明諭汝眾。凡我各路兵丁將士。無不恪約遵束。謹守

奉行。一切軍中所需。必依定價與汝購買。普法通用銀錢。亦當一準公平。用便軍民交易。汝衆其各知之。八月十一日。法各路援軍。及新選壯丁。俱至茂士大營。軍勢稍壯。十二日。法廷命德祿蘇爲大將。統制第十二路軍。屯劄於沙龍。又命巴彥爲大將。總制第二第三第四路軍。鎮守來因河。是時普軍游騎四出。各路雄兵。同時並進。前隊之偵伺營壘者。已至摩思厘河。普將分兵爲四。深入法境。一攻法之士打拉士卜。圍之數重。危迫異常。法之守城將軍余烈。嬰城固守。誓與城存亡。故猝未能下。一郡王所統。侵法之潘談毛辰。欲以偏師據守其地。一王子所統。取法之南士。攻兩日下之。爲普軍所據。一士顛密士將軍所統。直攻茂士。皆驍勇騎兵也。適與法

軍遇。彼此決戰。皆殊死鬪。經兩時許。法軍奔潰。此外更以一軍爲各路應援。遙駐士打拉士卜城外。扼守輪車鐵路。使由厘安至法京巴黎之道。阻遏不通。於是法軍知不可支。紛紛撤守退兵。普軍乘勝追襲。馬蹄蹴踏之聲。不絕於道。法軍至摩思厘。餘衆遁入內地。散駐於瓦電城。力天畢城。廉士魯城。法軍夤夜狂奔。幾於馬不駐轡。人無停趾。普之大軍至。是直抵茂士。八月十四日。遂有茂士之戰。初兩軍屯於茂士。互戰相持。未有勝負。法將麥馬韓擬駐沙龍。以待援兵。然遲之已久。不至。十四日晨。巴彥出戰。大舉對壘。法兵六萬。普兵七萬。自午達申。各未獲利。普法兩軍猛力相撲。有如兩獅之奮鬪。迨日將西墜時。普前隊軍士。見法陳已動。漸有退志。蓋軍

普法戰紀卷三
士欲退入瓦墩。再往沙龍爲守避計。普將哥耳士知其可乘也。乘勢奮擊法軍於棚邑。法之統兵戰將爲德乾。死力搏拒。殊甚危急。法將富魯實覘知之。盡率傾城之兵來援。普薩索尼邦將軍革林麥。率第二路飛騎逆敵。方相持間。普又遣甘密冷芝耳二將。統師攻法之左翼。縱橫馳驟。猛銳莫當。法軍衆寡懸殊。遂不能支。普軍悉驅之入礮臺。法將拉麥羅圍攻普軍右翼。繞之三匝。勢瀕危矣。而普之緩兵驟至。普將蠻雕飛統率餘勇。猛毅罕儔。謂其下曰。汝衆當依吾鼓聲而進。遲則有誅。鼓聲初震。軍士皆奮迅衝突而前。如狂飈急雨之莫禦。法軍大敗。普將長驅逐北。追之至近始止。法軍之在後者。鎗已及背矣。法軍盡退入城。陳傷者四千人。是役也迭戰。

三日。兩軍死亡者不下十萬。法約五六萬。普約三四萬。尸積如山。血流若渠。誠爲自古未有之血戰也。初巴彥本擬於八月十五日出戰。因是日爲法王生日。欲大舉獲勝爲法王賀。不意爲普人所覘知。先一日擊之。是以猝至覆敗。巴彥氣憤填膺。大爲扼腕。乃自巡各營。撫循士卒。於壯健者勗之。創殘者恤之。令於軍中曰。繕甲治兵。秣馬蓐食。明日再戰。普將知其謀。相議曰。何可使其蓄養精銳以圖我。薄暮復突出勁騎攻之。法國四將拉麥路飛利德乾富魯實。重整隊伍。再與決戰。富魯實麾下兵力最寡弱。因殲於沙勃勒之戰也。普將士顛密士。統第一第七兩路軍。分左右翼而出。兵鋒始交。戰猶未力。法軍藏身土窟中。鎗礮所攻。藉爲障蔽。先是巴彥知

普軍不易勝。遂爲持重計。命軍士掘土成濠。外壘而內
塹。恃以拒守。及戰。遂用是策。普軍阻於坑塹。未得遽前
攻擊。逾時。法軍漸懈。普軍乃猛撲越塹而進。法軍群奔
他塹避之。普人乘勢逐法軍。由此塹驅至彼塹。時天已
曠黑。法兵遁於礮臺。不復出。法將巴彥欲由蔑士至窩
但。屢爲普軍所截。不得進。以普將士顛密士屯於蔑士。
普郡王屯於潘阿毛辰。普王子屯於南士。三處皆有重
兵堵扼。故也是日之戰。兵愈盛。而鬪愈力。法將巴彥所
統。不下十三萬。普將士顛密士所統。亦不下十餘萬。兩
軍計二十有五萬。戰時。普軍面東北。法軍面西。僅距數
武地相持。進退數次。繼而火器互發。烟燄蔽空。普軍冒
危衝突。猛厲無前。法軍遂北。有普士隨軍紀錄云。是役

也。生擒法軍二千。大礮七尊。帥纛二桿。法之大將富魯
實伯爹耳體。皆爲飛彈所傷。陳亡法將二。普之迂蘭軍
最驍勇敢戰。所向披靡。是日馳入法軍隊中。幾獲巴彥
左右從官二十人。悉殲焉。因昏暮不能見。始止。收隊之
時。兩軍各自言勝。以法言拒退。普軍得復所據之地。以
普言大挫法軍。法軍雖多。仍驅之回蔑士。實則勝負相
抵。殺傷相當。法軍雖奪氣。然尙可用也。十六日。普大將
阿雲泉督率馬步各軍。區爲三路。由蔑士啓行。兼程而
進。專向瓦頓。取道於西隅。其路爲敵人退師之所。故潛
躡其後。冀襲而覆之也。十四十六兩日。迭次鏖戰。普軍
雖多於法。然不能驅之卽退。以法軍人人併力奮擊也。
但法軍所踞。雖得地利。而不知守。其所爲。亦未盡人事。

此所以卒至於敗也。戰時結隊立陳。參差不整。軍士亦非萃於一處。或布於東。或屯於西。錯落若晨星。不相顧應。使其併力合攻。蔑士之圍。未必不可解也。又安能攻瓦頓。取沙龍。而驟至於京師。當戰於弗萊池。威臘鄉村間。鎗隊施放火器。鋒勢正銳。而一時間藥彈忽盡。嚴催力促。良久始至。及啓櫃觀之。敝革履盈其中而已。蓋有嫉巴彥之成功者。故以此沮之也。設斯時得以接濟。則普國郡王之兵。必可退走。而普軍勢孤矣。議者謂普軍越境遠攻。無虞不給。法軍近在國中。反多掣肘。誠所未解。是日戰時。法王駐軍朗威兒村。王子從官隨侍左右。普軍未知法王之在是村也。否則必以長礮巨銃。專向轟擊。然飛彈蔽空。已有隕於法王前後者。大帥知之。飛

書至營。請法王駐蹕他所。法王乘馬遽去。顧四周皆有普軍。耳目偶一不慎。卽爲所截。俄有導者至。引法王從葡萄園密林中行。依樹循澗。逶迤甚遠。有一處距普軍僅四五里許。以法王皆從小徑盤繞。故普人未及知也。行約二時。方遵大道。先抵革利父辣。後至瓦頓。駐蹕一日。以城小守單。恐不足當大敵。遂去之。由瓦頓乘三等輪車至沙龍。命人翼衛王子。避兵他所。時法王子猶服寶星之衣。統領衆軍。行經一山溪澗交澱。景甚幽寂。王子悅之。小坐沙上。以杖畫沙。作人物形。其從容暇豫如此。十四日之戰。普軍陳亡者一萬七千餘人。法亦受創十六日之戰。兩軍布陳於摩刺多。普軍十五萬。法軍十二萬。普大將士顛密士爲前鋒。郡王繼其後。法大將巴

彥爲統領。次將拉麥路爲右翼。日加辰。兵刃始接。普大將士顛密士率第三路騎兵。橫截法軍。普國第十六路第五路孛蘭登北兵。及第三路步兵。從之繼進。互爲聲援。於是法軍中斷。法將富魯實率第二路軍。欲向瓦頓進發。至是爲普軍所扼。不得前。兩軍爭踞險要。併命相角。法將拉麥路統右翼之軍。奮勇馳入普陣。擊敗普之攬散兵士。擣其帥旗。法戰將禮其倫驟馬直前。迭發數鎗。擊斃普將威第兒多迷二人。而魯撻魯志二將亦被創甚劇。普埃兒勃王子之騎兵奔目。亦中飛礮死。兩軍互持。至三時之久。殺傷相當。各無勝負。普郡王統第八第九第十路軍來援。其至也。勢若潮湧。萃攻法之第二路軍。巴彥見法軍不支。遂偕德乾拉麥路堅拉白并御

林依飛軍。分五路齊進。助擊普軍。於是數十里間。皆作戰場。由蔑士至瓦頓之路。爲單安潤鄉歪安尾兒鄉。皆爲普郡王之兵所屯。法軍欲前不得。不得已退守蔑士。戰至日暮。始各罷兵。法軍陳亡二千人。被傷者一萬五千人。擣其大幟一桿。奪獲大礮七尊。法兵雖不得瓦頓。而普軍在蔑士左右。所結營壘。至是盡爲法人所得。故法將巴彥移檄諸軍。謂是戰盡驅敵人出蔑士。以捷聞於朝。戰之明日。普王偕軍師毛奇首相俛思麥及左右從官。往觀戰場。所過之處。軍士皆鵠立於道。大聲呼曰。今日我軍告捷矣。斷不使法之一卒得脫由蔑士而遁於瓦頓也。衆行既近。見蔑士之外。於亞士村利嬌尼士村般尼村哥林比村相間之處。彌望空闊。皆前日兩軍

血戰地也。當戰時。法軍屯於蔑士之東。所結營壘三。有若鼎峙形。地步極曠展。法語紀龍密塔題促者九創殘之卒。不以普法為區別。皆昇至醫館治理。兩日舉之。猶不能盡。有登高阜而望者。見摩思厘河右。塵埃蔽天。知法軍向西退矣。法將巴彥本欲遁走高但。移往沙龍。今為普軍所截。仍留蔑士。八月十七日。日加申。普將士顛密士。統領第三路軍驟至。巴彥即出應敵。排列隊伍。作長陳。皆近依土壘。以為障蔽。俟敵施礮。則匿身塹中。敵前則還礮擊之。發礮雖緩。而多中。久之。普軍奮力越塹而進。法軍遂遁。附近數村落。坑塹縱橫。築壘蔽之。猝不易攻。普軍死傷殊衆。列前茅者尸相枕籍。是日之戰。法拒而普攻。英國語。攻敵芬肆夫。法軍隱伏土壘。燃鎗時。僅出其首。是以被傷多在

面目間。偃臥道左者。亦復纍纍。曾見一塹中。創殘法兵。計一百八十一人。相持至暮。法軍始入蔑士礮臺。退時皆狂奔亂次。漫無行列。未傷之兵。亦從之俱走。巴彥所統德乾富魯實拉麥列三將麾下之兵。被擒殆盡。或言其持戟不戰。束手受縛。是以甚敗。是役也。普郡王大捷於蔑士。普王子大捷於魯尼微。皆雷轟電駭。石裂山崩。力戰而後獲勝者也。自此一戰。巴彥之兵。不復敢西向矣。普於是建築鐵路。轉輸軍實。以資接濟。路成可以直抵蔑士之南。兼可徑趨東北。使沙勃勒蔑士囊西。即南三處相為聯絡。即不得蔑士。亦可來往無阻。所造鐵路。彷彿亞墨利加人建於平原之法。殊甚簡捷。不日可就。建築工匠。日有數千人。或有拘法人為之者。以法人多在蔑

士城外繕修礮臺。增置土壘。故招之殊難也。普人又用電氣秘機。傳遞軍事。其報捷速如神。第懸空鐵線。時爲法之農人所斷。鐵路既成。皆以輪車轉饗。供應軍需。糗糒芻糧。器械藥彈。無不充給。於鐵路兩旁。削樹爲電線之柱。每當戰陳之後。軍士無不郵寄家書。慰安戚屬。頃刻往還。盡爲歡悅。故士卒無思家之念。鬪志百倍。樂於致死。蔑士之戰。法王退駐沙龍。法王子未知所適。莫得詳其踪跡。或云。八月十四日未刻。法王由蔑士啓行。退入瓦頓城。是日法軍渡摩思厘河。是夕亥刻。法王駐駕泰安威利。傳檄法京云。法軍渡摩思厘河。時甫至半渡。爲普軍所擊。法軍與之奮力相持。歷兩時許。戰退普軍。十七日薄暮。法王駐蹕沙龍。普國追襲之師。已爲法軍

所擊退。屯駐於沙龍。以爲犄角。法王子不在大營。或云。已至法京入宮。後盡取金玉重器。携至英國。居於法國駐英使臣公廨。法國首相阿厘華。挈其妻孥遁奔以大利浦。甫出國門。卽有斥詈之者。以大利聞。法軍屢敗。民間時有震動。朝議撥銀錢四十兆爲軍餉。練卒備兵。保衛邊境。普王以兩國之戰未有止時。遂下遴選新軍之令。傳檄各鄉團練勇丁。以備國家之用。一時雷厲風行。爭相踴躍。於十二日間。計出戰疆場。入守邊圉者。已得百十二萬四千人。有將行婚禮者。卽不受室。有將餬口他所者。卽止不行。有貿易在外者。卽返國中。蓋自團兵令下。無人不思慷慨從軍矣。公而忘私。國而忘家。普民有焉。推其急公好義之懷。無不人同此心。心同此理。法以

重兵鎮守北阿洲之阿耳支里亞。恐其或有乘機作亂者也。阿境部長請於法王。願以騎兵二萬。太高族兵三萬。助法攻普。法京附近地方官民不和。略有內亂。法京聞敗。民心惶遽。新任首相布告於朝曰。普國懸軍深入。利在速戰。此時我軍不用攻截。但當退守沙龍。堅壁清野。以老其師。彼久在敵境。求戰不得。銳氣必墮。因其敵也。而攻之蔑不濟矣。八月十七日。法將麥馬韓收集殘軍。退守沙龍。群議必待普軍進攻沙龍。然後出城決戰。否則徒輕與敵。甚無謂也。普國攻取法之羅連郡。挨耳西士郡兩地。皆擬設官居守。普王乃立將軍布妍爲羅連總督。統第三第四路軍鎮守。立副帥比思麥布靈爲挨耳西士總督。統理諸軍。法人因普軍日逼。議守京師。

於三日間。催運大礮一千尊。布置於諸礮臺。以資守禦。立德祿蘇爲法京兵馬大將軍。總理京師內外礮臺。傳諭守城兵士。盡力防堵。所有糈糧衣履。供給守兵者。毋使有缺。時麥馬韓屯沙龍。巴彥屯蔑士。兩軍聲勢。不得聯絡。普國出師攻法之輝士北城。圍之三匝。法軍開關迎敵。無不踴躍敢戰。以一當十。普軍敗退。其圍遂解。普軍陳亡者一千三百餘人。十七日。法軍又有加厘威律之捷。法軍結營於加厘威律。普師來攻。法軍奮力與戰。普不能當。遂退。然法軍損亡甚衆。八月十七日。普法復有里蘇維之戰。英國文士在普營中所目擊也。是日。天未昧爽。忽聞軍中有吹角聲。軍士持械齊出。時昏黑不能辨色。乘車至穀士村。其地距潘阿毛辰三十六里。途

中見俘獲法軍。纍纍係屬於道。普軍見之。或有慰之者。或有訕之者。但所操者普語。法軍不知也。其後輜重之車。絡繹而至。皆法軍儲載食物。爲普軍所得者。斯時車阻不得進。乃下車而行。約十八九里許。抵拿温村。正值騎兵渡橋。於是疾趨至阿士。始聞礮聲由右山來。既過拿温村。遂上高坡。忽覩戰場一望。尸骸枕籍。此卽十六日威安維耳戰所也。於時死者已半瘞。傷者舉之猶未盡。有五人枕臥草際。手足尙蠕蠕然動也。繼登一岡阜。普軍大聲呼其同伍曰。盍前來觀。既造岡巔。戰場卽在其下。一覽空闊。普法兩營了了畢見。普軍分左右兩翼所立處。斃馬積尸。前後左右皆是。蓋卽十六日普法鏖兵之地。其地有路可達瓦頓。亦通法京。憑高望之。其路

粲然。徑直有若銀線。四周村落。大小聯綴。類貫珠然。村中鐘樓高矗者無數。旁多樹木。密蔭蔽虧。其後屹然雄峙者哥士城也。所戰處名革里富律鄉。故亦爲革里富律之戰。戰場方十有二里。至時日已加未。其戰已酣。普王王子首相俾思麥軍師毛奇郡王阿耳拔左右從官。皆於山巔觀戰。時法軍爭據瓦頓之路。相持甚力。然法軍戰撲雖猛。而數少於普軍幾倍。故終不得勝。法軍從高處擊普軍。隨巨礮奮呼而下。轉鬪久之。已出革里富律之外。其相對村落。已先爲普軍所守。占踞形勝。普又調集餘勇。續來助戰。革里富律鄉外。地方狹隘。兩軍相接。艱於舒展。其地兩旁高山聳峙。中有一溪水若瀑布。從高注下。廣約五六十丈。深約十丈。頗爲峻險。初時普

駐軍抵阜。法屯兵高岡。以上臨下。普勢不支。軍士之中礮死傷者如積。法軍礮手據蔑士路上。游隱於叢林深樹間。鎗礮之聲。連環不絕。以施放墨迭兒魯士。故甚猛且速。普軍礮手屯於革里富律鄉之南。面向高處擊之。是日法軍有進無退。陳法甚整。普軍奮擊再三。不得動。然普軍惟知向前。雖兩旁積尸纍纍。不少顧避。兩軍併命相持。互有殺傷。俄而普營援軍大至。右翼之兵皆從密林中行。經兩時許。尙陸續不斷。普將高斌伏於叢樹中。俟法軍行近。出擊。彼攻此拒。將至酉刻。法人始知林中有潛伏者。乃燃礮專向轟擊。於是普軍不進。旋見步兵一旗。隊伍整肅。蜿蜒而來。遙望之。勢若長蛇。頃之沿山南而去。蓋高斌統兵截法軍後路。以山徑坦夷。故

取道於此。戰時普軍左翼。烟塵蔽空。目昧不見。少頃風驅烟散。見法軍尙峙其前。於是普軍奮呼而出。馳突其陳。法軍不少退。其地近威安維耳。普軍所必爭者也。普乃攻以短礮。炸彈橫飛。火星流迸。於時普將士顛密士之兵。角其左。普郡王之兵。犄其右。左右相應。環圍蔑士。普法兩軍相持。進退勝負未分。戰至亥刻。法軍遁走。始止。普王觀戰之山旁。有巨家別墅。園囿宏敞。外障高墻。普王乘鐵梯上觀。軍中時飛遞信音。當兩軍搏戰時。獨立不語。若有所思。其容一似深有憂者。蓋憫軍士之勞苦。死傷之慘酷。心中大有所不忍也。普相精神全注於戰。見法軍將有退志。遂馳馬下山。督勵諸將。行時多有稱賀者。於是遽返報於普王。軍師毛奇在旁曰。我軍勝

矣。奉觴上壽。普王欣然。爲盡醕。首相飢甚。索軍中乾糒。以果腹。時天已曠黑。普王覓睡。所不可得。普相入數屋。則中臥。陳傷軍士殆滿。最後得一空室。中僅兩榻。普王據其一。密裁字。公爵亦據其一。美國舍利單將軍臥於牀下。是夕厨人所供御膳。僅雞卵一物而已。或有笑普相之不得宿處者。謂若是之矯矯名卿。煌煌相臣。割據顛麥國。吞併哈云那。雄才偉略。見欽於列邦。而乃不能置此七尺之軀。爲鼾睡地乎。普國君相躬行節儉。與士卒同甘苦如此。其笑之者。實重之也。是日之戰。普軍陳亡者一萬八千人。法軍亦不下此數。或云約喪二萬五千人。普郡王之兵。死傷殊衆。其存者困憊殆甚。不能成列。戰至戌刻。革里富律山巔高屋。悉爲礮所焚。燬光燭

霄漢。是役也。法將巴彥。尙思由蔑士徑趨沙龍。不意爲普軍所截。竟不得過。蓋革里富律一鄉。地當衝要。勢所必扼者。當亥刻將收隊時。法又出兵攻普右翼。礮聲猛烈。猶有餘威。旋見普軍不可動。遽退。普人笑法軍始奮終怯。有如強弩之末。不能穿魯縞。蓋自此一戰。蔑士左右高山。盡爲普軍所踞。布置營壘。橫截法軍。使蔑士與法京。信息不復相通。而與沙龍聲氣亦幾隔絕。每遞軍事。必閱九時之久。始至。說者謂普王子郡王之用兵也。彷彿孫吳。如麥馬韓巴彥者。皆法久戰之名將也。行軍時相犄角。麾下所統。悉精選之勁旅。軍中所用。咸命中之利器。是豈小弱哉。乃一戰而合者忽離。再戰而離者不可復合。追奔逐北。幾於救死之不暇。何則。蓋法軍分

布四境。而普軍聚攻一處也。分則勢渙而形弱。聚則勢盛而氣銳。惟先專力併命於一城一邑。以挫其鋒。而後來之戰勝攻取。已如操券。此所謂覆其偏。而衆自攜。蹈其瑕。而堅自摧。用兵之道然也。自威申勃孚卜瓦士三戰之後。法軍喪膽。麥巴二將。倉皇道路。疲於奔命。蔑士之戰。但扼要害。據險阻。彼自不得越雷池一步。麥馬韓巴彥輩。幾於塲中傀儡。一經舉手。可東可西。嗚呼。非用兵如神者。其能如此哉。非然蔑士者。法國之重地也。鎮以虎將。守以雄師。礮臺林立。皆踞形勝。每一礮臺。巨礮九十。驍勇數千。高峯深澗。何啻金城湯池。此所謂天設之險塹也。法王御營屯駐於此。正以有所恃而不恐耳。普王子知其然。不攻其所難。而先攻其所易。不攻其內。

而先攻其外。羽翼既翦。形勢自孤。法王雖不退師。其能久駐乎。况以君臣相貳。將帥不和。敗氣先形。咎徵已兆。其能與普爭乎。普王子特出奇兵。阻遏蔑士。在三戰既捷之後。以前此法軍雲集蔑士。其勢猶盛也。其中斷法軍。使之各不相顧者。一以遏蔑士之出。則十萬之兵。無所施其用。一以阻沙龍之來。則援軍無自而集。自此近不得通瓦頓。遠不得達京師。軍情壅滯。朝議疑沮。而法國全勢。已在掌握中矣。夫法境雖廣。而要隘之所可資控扼者。亦不過數處而已。由蔑士入。卽爲瓦頓矣。由瓦頓入。卽爲沙龍矣。倘沙龍再不可守。普軍卽當直抵法京耳。城下之盟。大可寒心。法王雖崛強。其將何擇爲側足地乎。或謂觀於蔑士之戰。知向日所築礮臺。盡爲無

用。不知地利不如人和。以守之者不得其人。而遽謂設
備籌防之多事。將易所謂王公設險以守其國者。何耶。
此亦不揣其本末者矣。八月十九日。普人分軍進攻瓦
頓。法王駐蹕廉士。軍書旁午。積勞成疾。云。普王子屢
聞捷音。遂統第三路軍進攻沙龍。其城爲法將麥馬韓
所守。而德祿蘇將軍亦駐營城外爲犄角。軍力頗厚。故
普人急欲下之也。是日。普王子親統御林依飛軍。益以
第七路軍。與法國諸軍會戰。普之騎兵驟馬馳突而前。
勢銳莫當。法軍皆卻。麥馬韓率兵退入沙龍城中。堅守
不出。法將飛厘扼守城外礮臺。以禦普軍。相持不可猝
下。旋爲普軍設計環攻破之。生擒法軍七千人。於是城
中無援。其勢漸孤。麥馬韓下令軍中籌備守具。悉力防

禦。併於綿河左右。嚴行堵扼。諭之曰。慎固爾守。效死勿
去。八月十九日。普王駐蹕於李辰威兒。以電報傳書於
后云。昨日之戰。大獲勝捷。是日清晨。特撥第九路軍第
十二旗兵更及護勇。先向蔑士瓦。但相間北方之路而
行。直進至聖摩思厘當葛。時第三第十路軍隨之。繼至。
第二第七第八路軍則留屯於李辰威兒。以其地近於
蔑士也。於是上數軍。即第三第九第十路軍及第十二旗兵與護勇奉命轉往右隅之革
尼威兒村。聖布禮核村。林樹深密處。下數軍。即第二第七第
八路軍士也。
伏於革里富律鄉。緩攻法軍。以俟上數軍進擊。蔑士上
游亞蠻威兒。聖查問隘口。兩軍既接。各殊死鬪。迨是日
申秒。我軍數路並集。奮力馳擊。法軍始不能當。初第九
路軍於已正列陳。擊法軍於林中。攻拒相持。併力奮角。

時普軍僅能由漸而進。頃之聖布禮核村爲護勇所取。革尼威兒村爲第九路軍所取。其爲之犄角者。第十二路軍及第三路軍礮隊也。次第進兵。衝突助戰。革里富律村爲第七第八路所取。兩旁林樹中皆爲法人據守。我軍力戰爭取之。喪傷殊衆。至晚再攻法軍。欲驅之深入也。法軍伏於林中。以礮轟攻我兵。連環不已。勢猛而發捷。第二路軍冒死突前。以鎗之尖刃。縱橫擊刺。始得奪其隘口。戰至戌杪。各路礮聲始爾絕響。是役也。誠不減沙都華之戰矣。於時我出而撫循三軍。將士見而來迎。無不歡聲雷動。我軍臨陳。猛厲奮發。殆無其比。法軍始進迎敵。雖氣銳志壯。然輒爲我軍所擊退。法軍今爲我大軍所困。環之三匝。猝不能出。至於後日若何結局。

則非人所能料也。若問我軍傷亡之數。不妨據直告之。茲聞殞於疆場者不少名人。但一時未得稔其確耗。我將窩得士亦已受傷。殊不甚重。是夕幾無宿所。擬偕二三將士露處。擐甲枕戈而臥。迨後覓得空室。又攜有臥具。始得高枕安眠。蓋行師倉猝之間。如是其難也。我未易袒服。已三日矣。因由潘阿毛辰馳驛至此。未及攜行李也。聞此捷音。自天所錫。寸心感謝。曷維其已。今按普國自戰勝於威申勃以來。雖屢奏大捷。而統兵弁目在陳傷亡者。不可勝數。普國軍制。承平時以三千六人爲一旗。統兵弁目六十九人。威申勃之戰。第七十七旗亨挪瓦_{北日耳曼地}兵目傷二十五人。第三十九旗禮吳倫得_{北日耳曼地}兵目傷一十六人。第八十一旗熙盛_{南日耳曼地}兵目傷十九

人第九十五旗爹林芝恩兵目傷十有六人第三十八旗熙盛兵目傷十有四人第五十三旗威士非立兵目傷十有四人第八十八旗拿撒威兵目傷九人第八十旗熙盛兵目傷八人瓦士之戰陳傷者更衆以法兵踞山結陳從高臨下相持兩時有餘普軍被擊者肉薄仰攻故創甚焉第五十八旗波心那列日耳曼地兵目死傷者三十二人第五十九旗波心那兵目死傷二十三人第七旗波心那兵目傷三十五人第四十七旗沙利仁亦日耳曼地與傷三十三人第五十七旗沙利仁兵目傷三十人第六旗威士非立兵目傷二十八人第三十七旗威士非立兵目傷十五人蔑士之戰第七十七旗亨挪瓦兵目死傷三

十人普法兩軍攻拒於蔑士者三日驅數十萬衆鏖戰決勝兩軍死傷數至十萬附近蔑士左右如馬拉多鄉威安維耳鄉尸骸塞空輜重山積縱橫數十里不絕血流至馬拉多鄉若決溝渠洶湧有聲時普軍死傷者多於法軍因普軍衆法軍數稍寡也戰於士比沙倫普之驍騎陳亡更衆其地四面皆山法屯其上而普攻其下法軍四萬據險俯擊普初以一萬軍往敵不勝驟增至二萬七千第四十八旗禮吳蘭得兵中第五隊往戰往時二百五十人得返者一百二十九人而已第八旗布安丁孛兵中第一隊往戰迄暮撤陳死傷一百七人他旗他隊有往戰者及其回也僅存少半耳統計陳亡八百一十一人傷者一千四百八十六人二萬七千中死傷

者約十有二人。居其一。蔑士第三日之戰。第四十八旗。禮吳倫得兵。爲普國選鋒之軍。專以鎗隊攻敵。弁目喪亡者三十二員。兵士八百九十一人。其存者僅兵弁九員。兵士二百七十人而已。凡有傷殘之兵。收隊後。卽昇至醫館調治。普國所設隨軍醫館。在蠻顯有四大所。其中布置周密。百物充牣。凡有所需。叱嗟立辨。助理醫士者。神父童貞之外。村落中好善女子。咸往焉。殫竭心力。不憚勞穢。其屋皆極廣敞。軒朗。每房俱有牕牖。以疏通天氣。本係巨室所居。樂捨之以住病人。弁目兵士。分室而處。而以尤爽塏者居貴官。每一童貞調理病者兩人。捨屋之富者。亦時來訪問疾苦。普王子之妃。常至其中。躬親湯藥之役。撫恤倍至。軍士無不感歎泣下。曾有鄰

國遊士。入而觀焉。歸述其所見云。有戰於威申勃。受傷之弁目。其人精健絕倫。礮斷左臂。雖痛楚而神志湛然。顏色殊和。副將二人。其一傷左手足。其一傷於胸。皆劇症不可治。然皆無呻吟委頓狀。談笑自若。舉動如常。傷手足者自言。所中係法國新製墨迭兒魯士礮彈。啓筒出彈與觀。乃於骨中取出者。其骨已碎。彈作扁形。且言。太高族兵極爲悍酷不仁。法國不宜調取此兇殘。以與禮義之邦相角。有一法兵。礮傷右胸及左項。彈從背出。醫士雖爲之敷治創痕。然終於不能救也。有一南日耳曼兵甫昇至者。雄健魁梧。狀極岸異。彈已深入肉際。醫士卽欲爲之取出。問需麻藥否。兵曰。痛亦可耐。何必乞靈於彼耶。其彈藏於背間。割肉始出。是兵處之泰然。一

若不覺。醫士取彈與之。觀曰。自後請常憶此苦。當普法軍興之初。英京日報局主命文士數人。隨營筆記。叙述見聞。其人後爲法軍所獲。歷數時旋釋之。法王詔弛前令。許其在軍紀事。不復禁。初有英國日報主筆之士。往見法國首相阿厘華。請其給予文憑。許得隨軍紀錄。阿厘華謂之曰。汝來甚善。我正欲與爾言其故。我國兵部大臣里布父母許郵局人員。得有一人橐筆於軍營。詳書事實。卽本國人士。亦無許往。今者英國郵報所論。普法啓釁之事。其命意所在。實有未明。我閱之。不勝爲之殷憂。此蓋未稔乎原由真實之處。而遽爾置議也。我主時欲與英國共敦友睦。因英法兩國貿易利益甚廣。不謂今日遽爲英國所評訕。謂我國有傷於歐洲和好。夫

我國豈欲首發難於日耳曼哉。但彼疊加凌侮。勢不得不出於戰耳。主筆之士曰。既有不許之命。不知可加以辨詰之詞。用伸其說乎。阿厘華曰。可哉。主筆之士曰。日報一端。實足以維繫人心。轉移憎愛。如兩國構兵。隨營紀事之舉。一許而不許。則所許之國。必能得我國之人心矣。請卽徵之近事可知也。一千八百六十六年。普奧之戰。英國人心。本多向奧。迨後隨軍主筆之士。爲奧所辱。而北日耳曼軍。待之極優渥。於是乎英國人心。遂反向之。今者日耳曼軍。不惟許之。且重幣厚禮。以聘之往。此我所目擊也。法今拒之。誠未見其可。若虞其揚機事洩密情。則設法以制之。亦甚易耳。阿厘華見其立說。明通。論辨侃侃有理。甚爲嘉納。卽告之曰。此乃里布父將

軍之意。原非我心。容當再與商榷。以俟裁奪。主筆之士。乃別法相而行。或謂法之統兵將帥。嫉日報主筆之士。若寇讐。以其直言不諱。似涉謗誹也。主筆者言。法將於戰時。但知戀大營。而不知攻普軍。惟懼進喪其身命。不如退保其貨財。隳衆志。沮士氣。長敵情。實此之由。所刊日報。采錄軍情。間抒議論。皆由黑暗導之。至光明。彼昏不知。反指爲刺譏。行軍之要。偵探爲先。彼笑普郡王之粗疎。而自蹈於鹵莽。而不知瓦士之戰。對山皆叢林密樹。明知普軍之隱伏於中。而反謬言。攻以火器。普軍必走。試思普軍爲大樹所蔽。擊之豈能中哉。其愚亦已甚矣。彼不能猛如獅。捷如羆。矯如虎。而反貪如狼。狠如羊。拙如驢。欲軍之不敗。其能得乎。請以一事徵之。一日。法

軍巡閱高山。見普國輪船。駛入法境內河。法軍謂是必運載軍糧者。截而獲之。接濟可斷。急以白將帥反叱之。使退。於是闔營喪氣。迨後乃知舟中悉兵士。卽潛伏密林。以攻法軍者。使早驅之。則勝負之數。未可知也。主筆之士。持論如此。八月二十二日。普軍布於法境東南。法王御營。不得來。因河上消息。已兩日矣。所有道中遞信。電線。盡爲普軍所斷。普軍偵探之人。已在勝題沙山巔。窺望法軍營壘。盡得其詳。返告於普王子。於是普王子立統雄師。十有五萬。進屯於勝題沙。軍中有獻策於王子者。議欲由阿山谷進兵。直抵法京。其道雖極險。然實捷徑也。法京必不及備。當駭我軍之自天而下矣。乘其不備而攻之。可一鼓而下也。旋有阻之者。其策遂不行。

以大利國新與法國立約。合兵助戰。普國公使駐劄於
以大利京羅馬城者。已離其都。退旅奇罷刺。各國駐劄
法京公使。見普法兩國苦戰相持。息兵尙未有日。譬諸
兩虎相鬪。必斃其一。因議相機勸和。各歸於好。以大利
國總理外國事務大臣云。欲止普法戰爭。必與英俄奧
三大國籌商。方可爲日後排解之地。旋有西國日報云。
英俄兩國現已締約。必當排難解紛。毋許普國割據法
國也。越一日。法國總理外國事務大臣。移書於兩不偏
助之國云。苟容普國一兵。尙在敝邦疆域之內者。則勸
和之說。未敢聞命。蓋猶自負能兵。必能轉敗爲功。驅敵
出境也。俄於是更正前日所頒日報云。普法皆屬友邦。
法爲普所割據。豈敝國之所樂聞哉。惟普執持不可。必

欲出此。則敝國亦無權阻之也。英亦同此意耳。於是各
國勸和之說。遂沮。法國朝廷。移書比利時魯星_{荷蘭國屬地}。於是各
兩國云。貴邦旣云。各不偏助。何爲普軍之受傷旋國者。
屢許其假道乎。何以渝盟。敢請其故。兩國皆不報。普軍
以大礮環攻輝士北_北。是城內外。礮臺羅列。鞏固異常。初
攻時。彈盡墜於空地。了不奏功。後以巨礮炸彈。四周轟
擊。晝夜不絕聲。八月二十五日。天氣晴朗。軍士用命。自
卯達午。攻之愈力。雉堞悉摧墮。如齏粉。城中屋廬。咸爲
炸彈所焚。烟燄四塞。遙望之。其黑如墨。上亘霄漢。中又
間以白烟。城中河水絕少。不能施撲救。久之城破。普軍
遂入而踞之。或云。輝士北城中。精糧將匱。藥彈已盡。而
又苦於無水。故不能守也。是日。普之騎兵。群集於布連。

普國諸路大軍皆向沙龍進發。法將麥馬韓擬離廉士往援巴彥。與之合兵拒普。亦於是日自廉士啓行。八月二十六日。普軍取道綿士。徑趨沙龍。甫至。攻拔一邑。以屯軍。法將傳諭各營。盡法拒守。阻遏普軍。使不得進。調取守衛邊疆之兵一百旗。撥爲衝鋒陷陳之用。更徵年老之兵。以備守禦。以十五萬屯於里安。以八萬屯於京師。所有京師中貧民無恒業者。盡行逐之出城。恐京師或被敵圍。貧民無食。從中生亂也。傳檄各村鄉。凡曾隸兵籍。未經受室。自三十五歲以下者。盡出爲兵。統兵弁目自六十歲以下。偏裨副協各將軍。自七十歲以下。亦皆盡出。宣力國家。著爲令甲。守衛京師。大小各官集議於朝。謂普軍若果內逼京師。卽將京師左右仙棉兩郡。

餘糧棲畝者。盡行焚燬。免以資敵云。是日普軍前隊已離沙龍。進抵尼巴彌。其地距沙龍更深入三百里。普王子督率諸路大軍。鼓行而西。齊向法京。八月二十九日。日加辰。普法戰於士打拉士卜城外。法軍據險以拒普人。普軍於開耳河濱奮力攻入。遂踞其營壘。焚其礮臺。火至亭午始熄。未秒餘。燄又熾。當初戰時。法軍屢欲奮突出外。橫衝普陳。冀亂其行列。連環燃礮。轟擊普軍。時開耳一隅已爲普國俾定步軍所據守。出卽被截。互持三日。法軍終不得出。城中守兵單薄。漸有降意。特恐爲普所輕。故欲背城借一。然後定行止耳。至於城中食物。久已踊貴。半月前。牛脯一方。重約十兩。需佛狼五枚。約中國銀錢八分。民甚苦之。然登陴助守。無叛志也。普法兩軍於蔑士大戰。

三日之後。法軍大創。普人乃分軍爲三。普郡王以重兵扼守蔑士。以困巴彥。普王統領全軍。進圍法京。普王子率十五萬衆。攻法將麥馬韓於沙龍。蓋乘其憊而迫之也。麥馬韓卽棄沙龍。由北繞道。欲旋蔑士。往援巴彥。計六日之程。可抵其境。普王子知之。分兵數道並進。踞守要害。突出橫截。使不得前。前隊之軍。屯駐於沙龍。尼巴彌地間。以阻麥馬韓之回。麥馬韓乃折向禾思亞士。法王隨之以行。時普國新選各軍。陸續至營聽調。以第四路軍隸普王子麾下。命薩慎尼邦王子統之。以兩路軍益蔑士營。隸普郡王麾下。聽其約束。八月二十七日。普軍行至布申。與法軍遇。遂戰。法軍敗績。普軍勇士一萬四千人。奪踞廉士高阜。是役也。法軍曉夜兼程而行。至

此方憊。故不能戰。八月二十八日。普軍之屯守勝題沙者。忽拔營齊退。旋又駐於廉士。其駐劄在阿蠻兩處者。皆向北遄征。欲分屯於厘爹耳禾思亞士。以綴法軍。普王亦離士顛密士營。欲與王子合兵。蓋以法將麥馬韓軍勢尙壯。其人又素號能兵。而法王御營亦與聯絡。雖法王此時大權旁落。僅擁虛名。然猶足以繫民望。設使普王懸軍深入。進圍法京。獨使王子與麥馬韓旗鼓相當。卽令必勝。亦當稍緩時日。或恐我軍勢單力薄。敵燄復熾。外連蔑士。內援京師。則全局壞矣。非計之得也。故必待與麥馬韓決勝負後。然後專力於京師。此用兵先後之序也。法京大臣聞蔑士之役。三戰三北。知事不可爲。急籌堵禦。布告人民。和衷翌衛。新貸國債八百七兆

五十萬。以戰守之具。頒給勇丁。以資防扼。法圓兵部庫局議。由京師移入內地。或謂不如來昂地。廣物阜。正居法國之中。最爲形勝。北可以接京師。南可以達地中海。固不患敵之至也。法國戰船。其已出口者。亦皆停泊。不復前進。八月二十九日。法國大營。駐筭禾思亞士。法軍之退。自他處者。皆絡繹集屯於其地。普王子統兵北行。欲親與麥馬韓遇。猝攻其不備。所有廉士之旁。尼巴彌之右。普軍徧布險要。以待法軍。其數不下十餘萬。是日。普王子大敗麥馬韓右翼飛厘將軍所統之兵於門蔑地左右。擒兵四千人。八月三十日。法軍由禾思亞士。退往厘爹耳。法軍方退。而普軍卽抵其處。禾思亞士地。故近河。普以戰艦三十餘艘。往攻之。併及亞的尼左右村。

鄉。攻地利士村。破之。法軍之駐守其地者。盡爲所俘。法國遣十三路軍共五萬人。由法京赴援大營。普軍分道進逼京師。一由蠻。一由藐士。與法軍遇於毛辰。遂有毛辰之戰。普法兩軍相持至暮。猶未止。普軍之爲前茅者。第四路軍及巴華厘亞兵也。慄悍任戰。盪決無前。法軍以巨礮向之轟擊。卒不少退。法軍不得已。由毛辰轉向師丹。普人大敗法兵。俘馘數千。奪獲大礮十二尊。輜重無數。是日。日耳曼兵半屯於藐士河濱。薩慎尼邦王子麾下之兵。半已渡藐士河。經毛辰境外。向嘉利商師丹而進。普王子再敗麥馬韓於保間。擒兵一萬。獲礮二十五尊。八月三十一日。法將麥馬韓由毛辰渡藐士河。普軍再敗之於雕時及巴思厘。於是退保師丹。按師丹之

城負山而控河。敵登其山。即可俯瞰城中。絕濟守河。立能坐困。本非可守之地也。其北又與比利時接壤。援軍之所不由。法軍入其中。正無殊獸之投阱。魚之遊釜。普王子見麥馬韓既入師丹。以手加額曰。余事濟矣。此我國之福也。召集將士。來聽指揮。第一路軍巴華厘亞兵。由拉鵠至靈謀利。第十一路軍普兵。由都士至沙麥厘。以圍其西。兩軍建營。在藐士河濱。當沙利對面。蓋當沙利村。正居藐士河之右。而以第二路軍巴華厘亞兵。第五路軍普兵。爲其後勁。以壯聲勢。瓦添勃兵。由溫地厘士波田天葛兩處啓行。前往藐士河。以守其東。普王子親統大軍。以當其南。傳諭諸兵。三面圍攻。令其獻城納款。若彼棄城遁走。必迫之入比利時。普相俾思麥令於

軍中曰。若法兵入比國境界。而不釋軍械者。我軍仍可向前窮追。以法兵先壞局外。兩不偏助之義。此英國所不允者也。是日。巴華厘亞兵。在靈謀利。猝遇法軍。遂與接戰。日加申。用大礮環攻。法軍大敗退走。逐之幾及比利時境。至日西墜後始止。藐士河左。亦有小戰。時麥馬韓已將抵師丹境矣。乃於其外環築土壘。以拒普軍。互有殺傷。日加午。退至威利溫地厘。屢欲渡藐士河而南。卒不果。是日清晨。普王子至卑阿門。旋至靈謀利山谷。巡閱營伍。繼往司當午鄉高阜。觀戰指示進止。戰竟。經沙墨利宿焉。第二路軍巴華厘亞兵。瓦添勃兵。奉命卽行。遄征甚速。當師由沙墨利時。普王子適在其地。九月一日。天未昧爽。諸軍皆集布於藐士河左。聽令渡河。因

師丹在藐士河之右也。時最先渡河者爲薩慎尼邦王子之兵。其前隊已於八月三十一日午刻進逼師丹。以牽制麥馬韓。於是環圍師丹之兵。先後雲集。不下三十萬。議者謂麥馬韓雖稱名將。實庸才耳。其退保師丹也。不當僅守孤城。要先守河以重兵。扼藐士河右。毋許敵人一卒得渡河。則師丹猶可無虞也。不知此固不得爲麥馬韓咎也。麥馬韓知大事已去。志在以身殉國。每戰奮力先登。師丹城外之戰。正當馳馬指麾。忽有飛礮自空至。適中其身。創甚墜馬。諸將掖之至師丹城中。瞑厥不能視事。乃委雲芬代統其衆。故布置之疎。似不當專委諸麥馬韓也。嗚呼國之興亡。雖曰人謀。蓋由天焉。普國諸軍既集。遂議決戰。普王子軍師以薩慎尼兵兼程

進軍。勞憊倍至。擬緩一日以養其銳。獨普王持以爲不可。曰。銳不可隳。寇不可玩。一日之縱。數世之憂。敵軍自蔑士之敗。奔亡不暇。膽喪氣沮。正有可乘。我軍之銳氣正大可用。不於此時。颺馳電掃。深入長驅。振我軍威。摧其枯朽。而乃使其假息延喘。暫緩須臾。俛得以覘我虛實。而爲之備。其計不亦左乎。王子軍師咸斂手屬賀曰。我王廟算如神。非所及也。先是普王於八月三十一日酉刻。由沙墨利鄉至溫地厘士大營。與大將布朗敏佗籌論移時。已有成竹。至是其意遂定。是時法軍大營分布於師丹藐士阿敦士三處。普王下令同日進攻。所有部署普軍。略述如下。普軍大營之右。薩慎尼邦王子爲前茅。所統第四路軍爲其左翼。餘勇爲其右翼。第四路

騎軍爲其後勁。其有未濟藐士河者。則取道於都士村而來。以爲應援。大營之左。以第一路軍巴華厘亞兵爲中權。第二路軍普兵爲左翼。第十一路軍普兵爲右翼。已於八月三十一日亥刻。建營於當沙利村境上。約距一百弓地。村左有橋。守以第五路軍。爲犄角。瓦添勃兵屯於冬禮謀斯尼。第六路餘勇屯於阿特宜。其地相距數里許。法軍大營五。對峙其前。法大將麥馬韓居中。飛利堅拉白都烏屯其左右。皆殘軍也。惟新選第十一路軍利布倫兵。最精可用。法營以師丹礮臺爲中界。左屯至思温村。右屯至迷斯阿村。前後左右。碁布星羅。不下十五萬衆。普王子於是日寅秒。馳至當沙利山谷。趨登高阜。四處可見。以策軍士進止。師丹城垣近在藐士河

濱。最爲雄壯。河之兩旁。岡嶺盤互。其上林木叢茂。彌望葱蘢。河右平原開展。爲法軍校場。河之左。皆曠地也。當沙利正介其中。地形坦廣。漸高若坡。藐士河道彎曲。其左。陡出若箕。有三村。若鼎峙。中爲哀哲士村。左爲威立村。右爲革里士村。於哀哲士師丹相間處。則有富魯臨村。攝於其間。藐士河右。有珠温村。由當沙利往師丹。雖隔一河。而巨橋橫跨。可通往來。普人守之以兵。俟將戰時。斷之以絕濟。俾法軍不得過。師丹西南有巴思厘村。普國巴華厘亞兵所屯之營。正與相對。是日凌晨。山谷中大霧迷漫。幾於咫尺不可辨識。辰正日始出。乃大開朗。薩慎尼邦王子之兵。於卯刻。卽燃大礮擊法軍。須臾礮聲從右而至。則法軍左翼。已爲普軍所攻。時普軍屯

於富魯臨村。法軍專以鎗礮向之轟攻。廬屋盡焚。火光燭天。普軍乃移屯村外。卯刻。普王由大營啓行。親臨戰場。首相俾思麥軍師毛奇。欒將軍從登一高山觀戰。是山距師丹城約九里有餘。山左有谷。普王子駐營於其中。騎兵屯於谷下。其地非法軍鎗礮所能及。山左外圍。日耳曼後隊餘勇屯焉。以備阻截法軍遁走。遏之使不得出。騎兵之前。則爲藐士河。河上向有輪車大橋。至是已被普軍毀斷。山右亦皆爲普軍分駐處。師丹城富魯臨村交境間。平原空曠。有一小山突起。山頂亦甚坦闊。小山右卽師丹城也。由普王所駐山巔。皆可瞻望及之。一仰眺間。全城形勢盡在目中。師丹城外礮臺。城內屋宇。歷歷可數。中有一講堂。頗爲高聳。師丹以北。邱陵蜿蜒。

林樹參差。林下法軍所聚。約遠城東九里許。略有似土阜形者。法國屯兵所也。其外稠綠成陰。巨木千章。干霄蔽日。土阜之前。爲普國亞路拔王子之營。所統皆薩慎尼兵也。營後悉伏餘勇。以遏法軍之去路。防其竄也。王子之營與普王觀戰之山相間處。卽師丹之東南藐士河也。河之兩岸皆爲巴華厘亞兵所踞守。其右與谷下騎兵正相接。師丹之外。平原開廣。巴華厘亞礮兵屯焉。戰時普軍右翼攻法軍左翼。第十一路普軍由平原進攻。第五路普軍直搗法軍後隊。其意欲普軍左右兩翼相連。以全力專制法軍之右翼。四面萃而攻之。不使其由阿敦士村而遁。第四路騎兵及瓦添勃兵。踞守平原。以遏法軍竄突外出。鎗礮相接。攻拒相持。約兩時許。

第十一路普軍進逼法軍愈近。其鬪益猛。薩慎尼兵馳驟而至。前來助戰。勇若熊羆。銳莫能禦。法軍右翼勢不支。漸有退志。法之後隊亦為普軍所圍。繞之三匝。第十路普軍由高阜下平原。牽制法軍。自哀哲士村至師丹城。隴畝縱橫。盡已躡作戰場。普以大礮攻法。法亦以大礮還擊之。其礮皆以馬輦運而至。法國騎兵及所調北阿洲之察撒兵。皆捷於戰鬥。奮不顧身。特互持至午正。法拒普軍不甚力。勢漸弱。氣漸衰。步兵已先退。第五路普軍在法兵之後。乘勢追逐。使不得漸進。阿敦士自午至未。普軍鬪志愈奮。聲勢益張。已有必勝之機。法之礮兵零落不成行列。遂奔。於是法軍之右翼敗走。其在圍者。被困不得出。普乃集攻法軍中權。兼擊師丹礮臺。午

秒。普兵已抵師丹城下。以鎗隊為前茅。隨發隨進。遙望之。但見千百道火龍中。萬頭繼之攢動而已。其兵行之速。蓋有不可測議者。普之餘勇與法軍搏戰甚苦。巴華厘亞兵突出助鬪。銳不可遏。旋焚巴思厘村。悉成灰燼。

普軍之焚巴思厘村也。以是日戰時。村中婦女羣持白挺。突出。間以火器軍械。馳入普軍陣中。普軍驟出不意。被殺者二十餘人。有一老嫗。痛其夫及子之盡沒於普軍也。奮不顧身。挾刀出鬪。誓欲報仇。旋普軍以鎗擊之。仆。二彈洞其胸。焉由是觀之。法國雖婦人女子。繼亦知勇於赴義。如此。真不愧小戎駟職之風矣。即名是村為夫人城。娘子軍可也。

取巴蘭村。其村在師丹城西南。當兩軍之始合也。巴華厘亞兵扼其中。普兵居左。薩慎尼兵居右。初圍師丹城。狀如半規之月。其缺處即向比利時國境也。迨午普軍左右相接。環城一匝。其狀已如滿月。久之漸圍。漸逼。如環之內束。故月形亦漸見其小。於是直附師丹城下。其攻法軍也。自卯至辰。則用礮隊。火彈橫飛。烟塵蔽空。兩

軍相逼。積尸縱橫。自午以後。皆用鎗隊。短兵相接。若連環。若貫珠。兩軍併命於百步之外。法軍始與巴華厘亞兵薩慎尼兵相拒。奮力轟擊。致死抵禦。師丹城後所屯法軍。又以鎗隊助攻。使不得前。巴薩之兵。前後受敵。死傷枕籍。午刻。普國礮軍至。以巨礮六尊。堵守藐士河斷橋處。專向法軍礮隊環攻。法軍爲之氣沮。陳勢漸動。頃之。法國步兵以無礮隊翼助。卽由富魯臨村而退。普軍左右兩翼。旣連爲一。法軍皆陷於重圍中。戰至亭午。普奮法懈。法軍皆由富魯臨師丹相間處之小山遁走。對山普軍以礮攻之。隊伍益亂。鼠竄狼奔。徧山皆法之敗卒矣。有拉甲連山。形勢頗高。在師丹城之右。法軍由城右透邇而來。據登其巔。法軍甫登。而普之第三路軍繼

至。將抵山麓。蓋其地踞險憑高。易於用礮攻敵。勢所必爭也。法軍卽於林中燃礮俯攻。連環迭放。止之使不得進。普軍皆蛇行蒲伏而前。以避礮鋒。頃之。已集於山下。伺礮作則伏。礮止則行。未幾。已造其巔。由地躍起。一山皆普軍。法軍見其登急甚。卽以六人敵一人。普軍勢不支。下山以待援兵。援兵至。再登。而終不若法軍之衆。於是勉與之相抗。法進則退。法退則追。三却三前。而普已據山之偏矣。法又以步軍進攻。普軍結陳以待。俟其近至百步。始擊以鎗。發無不中。金蛇繚繞之中。聲若霆奔。彈如雨集。法軍步騎俱遁。普軍於是據有全山。頃之法騎兵至。復戰。時普國援兵絡繹登山。普衆法寡。遂爲擊退。普軍乘其退也。更進逼之。是山爲師丹城外形勝地。

法國屯軍於此。已扼要害。敵軍雖強。斷不能飛越此山。乃竟爲普兵所攻據。是則不善守之過也。地利不如人和。於茲益信。師丹城左有校場。頗極空闊。其相對處爲華烈村。有直徑可達。法之礮隊屯焉。普軍以大礮攻之。盡焚其村。烈燄騰空。天爲之赤。法之礮軍遁走。第十一路第十二路普軍。直趨師丹城下。法軍退入礮臺。所有山上法軍。盡爲普軍所擒。普國餘勇與第五路普軍。連屬如環。逼繞法軍。圍之益困。城外四鄉。悉爲炸彈所燃。火光燭天。法軍之奔走顛踣於路者。紛相屬。未秒已退。法軍皆入師丹城中。嬰城固守。申初。普之巴華厘亞兵。奮力先進。奪據師丹城外礮臺。巴兵傷殞者殊衆。申正。法軍又復出戰。互爭。巴斯魯一帶小山。旋爲普軍所得。

盡逐法軍。於是師丹城外。所有高岡低阜。無不密排巨礮。以備向城環攻。普王子以捷聞。大營且遣官至城下。諭以納款限四刻。後開礮攻城。普王觀戰之山。在當沙利村右。普王子分遣已定。卽偕高白公爵登山。見王時。未見城中。有白旗出。因命燃礮急攻。有一炸彈墜於法營。焚其帳幕。黑烟蔽天。酉刻。二普兵偕一法官至。手所執者降旗也。其致詞於普王曰。敝邑畏君之威。師徒撓敗。今願舉城降附。惟命是聽。普王問其職。則偏裨也。普王乃與軍師毛奇籌議。既定。則告法使曰。師丹地當險隘。固巖邑也。城中有衆八萬。非小弱也。獻城納衆。則又重任也。今汝實來。未有職司於城守。其能堪此大事乎。汝其速旋告汝城中上將軍。躬造敝營。親論款事。若少

遲迴焉。則敵國攻具已齊。三軍憤志。一鼓將作。勢難久
俟。汝其善達我旨。謂汝上將軍。卽舉全城之衆來歸。勿
待三思。先是法王見師丹之圍。知大勢已去。喟然歎曰。
余其又蹈前王之覆轍矣。今日余惟有赴敵而死一著
耳。乃親自督陳。躬當矢石。駐馬於哀哲士村者。逾兩時
許。礮彈所墜。前後左右皆是。而獨不及法王。時法軍盡
退。法王遂回駐城中。普軍以大礮攻城。火及廬舍。烟燄
眯目。民衆惶惶。不知所出。法王乃下令議降曰。毋以一
身殃全城。毋以一人毒兆姓。遣使普營。以俟消息。及使
返。具述普王旨。法王乃親修書函。命大將賴魯。賈往書
呈普營。普王展視之。爲之惻然動容。其書曰。寡人不佞。
不能死於三軍之前。願伏劍於大王左右。敢布腹心。惟

大國其圖之。普王以書示群臣。因與王子首相軍師欒
將軍欒將軍時兼爲普國兵部尚書議作書答法王。時在山巔。軍中無几。乃
命二侍者執紙。然後書之。其書曰。嗚呼上天降禍。使寡
人與王相見。不以玉帛。而以兵戎。今日之會。寡人實所
痛惜。大王所言。敢不如命。惟遣使前來。同商立約可耳。
復書不盡區區。法王得書。傳示將帥。初法王之議納款
也。斷自宸衷。但與左右親信諸臣言。及示以普王回書。
軍中始知。皆相視駭愕。大將雲芬慨然太息。泣數行下。
曰。吾甯就義而死耳。豈甘作降將軍哉。兵士中亦有奮
然作怒。拔劍斫石者。皆曰。願以死奉我王。雲芬因請出
使普營。以觀其變。許之。普軍師毛奇知其意。盛飾軍容。
延之入見。相見數語後。袖出師丹輿圖。與之觀。并爲指

示方略。彼軍若何扼守。此軍若何進攻。形勢勝負。了如指掌。听然謂雲芬曰。師丹城危若累卵。將軍尙未知乎。將軍不負國家。誓以死守。忠則有之。達則未也。古者明哲保身以圖後效。夫豈爲一己哉。亦爲國耳。以將軍之才。而乃出此下策。竊爲將軍不取。將軍其暫回城中。請再圖維。詰朝聽命。雲芬返告法王。願署己名於降書。然後降議乃定。是夕法王宿於師丹城。普王知款事粗有端緒。乃以政令之事屬首相。軍令之事屬軍師。遂旋大營。三軍執炬。排列兩旁。十餘里相連屬。照耀如晝。齊聲呼萬歲。普王大營。時建於因提利思。亥刻。普王子回營。兵士持炬稱賀如前。且歌愛國之詩。不絕於道。九月二日凌晨。法王至當沙利普營。見首相俛思麥。首相尙寐。

未起。聞法王親來。卽蹶然興。顛倒衣裳而出。免冠以見法王。曰。見王如見我主焉。偕入一民屋。屋中皆織工。無隙地。登樓亦盡機具。牕牖間塵網盈焉。乃出。法王坐門外石上。旋攜座至。始坐。普相侍坐於左。從官列坐草際。普相始以爲兩國自此議和息兵。講好。法王曰。不然。議降者。僅師丹一城耳。我今大權旁落。無所藉手。外不能調巴彥之師。使之來歸。內不能諭法京之衆。使之不戰。若欲兩國議和。則有法后在彼。可與京師大臣同商立約耳。我不敢預聞。我之所以親來者。誠欲見普王一決之也。普相曰。既如是。請先立獻城約。然後見王。未晚也。約苟不定。王不得見。兩人議不合。遂退。法王回師丹城中。召集將士共議。軍中忿氣激揚。咸願一戰。將軍雲芬

申勸再三。并爲指陳形勢。言師丹一城。決不可守。蓋師丹城外。四周山阜。皆爲普所據。環列大礮六百尊。以高臨下。以仰攻俯。勢必莫之能禦。師丹城垣雖固。而附城並無礮臺。雖有守城之礮。而竄敵不堪用。地形處於卑下。還擊爲難。未能得力。三面已爲普軍所圍。幾於環城。三匝。卽欲捨死衝突而出。以乘輿之尊。豈能保其萬全。敵情如彼。我勢如此。亦可了然於其故矣。久之。三軍之意始回。因與之約。嗣後必咸釋。汝不復再戰。將赴普營。雲芬告誡衆軍。其詞曰。嗟爾有衆。其聽之哉。昨日之戰。我師憊矣。自晨達暮。併命相持。汗血漂於旄旗。骨肉飛於礮火。力竭計窮。重圍未解。望蔑士之途。遙於萬里。出捫迷之地。捫迷。卽門。蔑。地。如限九淵。迨乎日昃。我軍皆創。獨有二

千之勁旅。猶堪當敵軍而一戰。然終被截於巴蘭。無能飛越。衆寡相懸。非力不足。嗟乎我軍。今在師丹。無殊絕地。攻無尺寸之具。食無盈旬之糧。卽此百雉之崇。墉安能禦。半天之飛礮。嗟乎我軍。既不能去。又不能守。嬰此孤城。坐以待斃。余也。位爲統帥。職掌兵戎。愧憤交攻。呼晷何極。誓欲擐甲執兵。南向赴死於敵。庶足以下伸士氣。上答朝廷。乃惟我王聰明仁智。達變從權。不忍爲一人。以喪全城。故不惜屈一己。以存衆命。昨者銜奉詔旨。親赴敵營。納欵獻城。具有成說。嗚呼。一爲降虜。遂作俘囚。豈余輩之所甘。無如不出於降。必出於戰。限以已刻。敵必攻城。今以敵強如彼。我弱如此。敵衆如彼。我寡如此。觀於強弱衆寡之數。則勝負可知矣。戰則必敗。敗則

必辱。別無再計。以出萬全。嗟爾有衆。其聽我言。與其今時徒死於疆場。孰若異日建功於家國。此身還在。期洒前讐。一息尙存。藉圖後效。嗚呼豪傑。以處晦而自保。英雄以暫屈爲知機。行矣勉之。尙其自愛。三軍聞之。莫不流涕被面。唏噓不已。午正。普軍師興法將雲芬蒞盟立約。彼此署名。所立之約。其款有四。一師丹城中軍士。盡當俘至日耳曼。由普拘繫。二所有大小統兵員弁。概聽自便。但既釋後。不得復履行陳。再攻普國。三所有馬匹輜重。鎗礮器械。藥彈軍裝。概歸於普。四法王當留駐於日耳曼。既定約。飛報普王。時普王已由沙亨利來。適於當沙利境。與軍師毛奇遇。普王遙見之。下車以俟。加以殊禮。毛奇至。趨伏道左。稱不敢當。普王命之。升車同載。

其隆重如此。旋普王與法王相會於藐士河濱。蓋以賓禮見。不以俘禮見也。瀕藐士河左。有大廈一所。富者所新建也。距師丹城不遠。僅一水隔耳。其地綠樹扶疎。芳草蒼鬱。隙地開曠。一望平蕪。四周村落。遠近可數。法王先入其中。憩息焉。從官咸在。列侍左右。午正。普王至。法王迎於階級間。相見儀節一如往時。普王意度謙恭。絕無驕態。普王先言曰。豈不穀之能遂爾行軍制勝哉。惟賴上天之佑。得至於此。法王曰。寡人不明。遽以兵戎。開罪大國。然寡人非欲戰也。不得已也。徒以俯順輿情。致興此役。普王曰。不穀亦料非大王之意。蓋彼小民。鬻於勇。而嗇於禍。罔顧國家之利害。然非貴國在廷諸臣。從而借端簸弄之。當不奮激如是。法王默然未置答。頃之

普王又言曰。貴國軍士臨陳勇猛。亦他國之所不及。法王曰。然如大王之兵。則可爲無前之勁旅矣。邇來敝邦軍政廢弛久矣。聞大王言。彌滋愧耳。普王曰。邇年來一切悉改舊章。並行新法。行軍履陳。隨地變通。法王曰。貴國礮軍。尤爲無敵。命中及遠。洞堅摧銳。幾令敵者莫之能禦。制勝之要。全繫於此。寡人雖敗北之餘。不禁爲之起羨。操此以往。天下恐無能出其右矣。普王領之者再。徐曰。敝國於別邦所行之新法。亦雅願揣摩。初不敢自以爲是。而輒自恃也。法王曰。戰最力者。其郡王乎。我儕皆爲其所敗北。普王曰。此戰乃我子統軍。若郡王。則不在此間。法王曰。然則郡王今在何所。普王曰。彼率兵方圍蔑士。法王聞之。色甚惶駭。雖坐爲之促數不安。蓋初

不料其神速之至是也。須臾色定。再言。普王因問曰。此時欲議何約。法王曰。無約可議。此時身作俘囚。豈復有權主張國事乎。普王曰。然則此時和戰大端。宜向何人言之。法王曰。今者法京猶在。上有王后。下有廷臣。彼握其權。當能定議。若我則何能行是哉。普王曰。我思以加須兒一邑。備大王駐蹕之所未識。可否。法王曰。固所願也。談言既竟。法王遂出。普王子入。見其以巾拭淚。法王謂王子曰。大王待我良厚。情好之隆。所未有也。言次嗚咽。不能成聲。普王所議。以日耳曼國加須兒城。備法王居處者。其地距法京。千有二百里。法國降兵不下十萬。由漸遞解日境。兵官五十員。悉行散遣。是日下午。普王用電線飛報國中。致書於后云。天佑我邦。三軍獲捷。法

將麥馬韓因戰而傷。不能臨陳視師。新立大帥以距我軍。惟我將士莫不競勸。一舉而翦之。遂覆其師。於是議款受降。開城自獻。法王束身而來歸。諸軍釋甲以聽命。用兵以來。未有奏功如是之巨且速者也。法國政事。法京在廷諸臣。實攝理之。法王所居當爲布置。我軍雖捷。轉鬪傷殞者。亦實繁有徒。嗚呼。聞此嘉音。益矢敬恪。布告國中。咸知朕意。九月三日晨。法王由當沙利啓程。取道於比利時國。以法王不欲令己國軍士見也。是晨大雨滂沱。隨行翌衛者。有瓦添勃_{曼地耳}兵哈撒_{ハサ}兵。爲法王前驅。法王侍從百有三十人。後車十一乘。馬八十餘匹。行李之車。透迤繼發。法王戎服登車。有一寶星當其膺。面有墨色。形態殊憔悴。或見其以手障目。暗自揮淚。臨

行法民多往觀之。然無憐惜之者。行時闐寂無聲。但聞馬蹄蹴踏。車輪輾轉。與雨聲相間而已。瓦添勃兵先車而行。跋涉泥淖中。徐唱凱歌。午正抵拉伯辣門。易車再行。因之少駐。有法國侯爵蒙多龍來謁法王。首述仰慕威德。繼及蒙塵之厄。爲之流涕。適駐筍比京比律悉之法公使亦在其地。同見法王。法王告之曰。我今往加須兒矣。言時作笑容。無悲戚態。人咸怪之。法王所經之地。人無不爭欲見之。以車行迅速。故得觀顏色者殊少。旋抵尖利兒。易車。有郡王派雅來至車前。法王之從昆弟行也。與法王語。音微細不可辨。將別。法王曰。相見之期。要不遠耳。酉刻抵波龍宿焉。時法王隨從貴官有摩是瓦王子。師丹總督理利將軍加士戴惱瓦勃。途中普兵

行左。法官行右。既至波龍。遂入客舍。是夕大張盛筵。侍法王。讌者三十人。九月四日申刻。抵列治。初擬由列治。至晏夏雅。繼以其地爲通都大邑。恐來觀法王者衆。故改由他途。後聞其地之人。集於車旁。迓候者。殆不盈二百。蓋以電報甚速。知者尙少故也。法王每至一地。易車時。環觀之人。前後圍繞。無不竊竊私議。或有言其體貌瑰偉者。或有譏其無憂戚容者。或有謂其面槁而目陷者。其免冠作禮者。僅一人而已。申秒。抵花威瓦邑宿焉。行三日。乃至加須兒省。入威林梭城。其城舊有王宮。崇飾華美。雄壯無比。向爲普王銷夏避暑之所。至是聖治一新。頗爲朗敞。城中廬舍參差。市廛開廣。園林綺麗。樹木葱蘢。四周村落。遠近聯屬。崇山峻嶺。聳翠峙青。山中

瀑布橫飛。泉聲噴薄。近城有孚得河。澗洄貫注。各村咸資灌溉。衢道平坦。兩旁皆植楸椽。每至長夏。濃陰蔽日。幾於忘暑。誠勝地也。法王既至普國。官民皆免冠出迎。法王亦遂下車。免冠答禮。宮外有樂工一部。每日朝暮奏樂。法王以供給煩費。酌減侍從。遣五十人回國。優賜兩月俸糈於加須兒官署。咨領憑引而回。法王御廐馬八十五匹。皆良驥也。以芻粟不貲。概鬻去之。僅留二十匹。以備乘而已。鬻價殊廉。售馬者大獲贏餘。自是法王居加須兒爲寓君。按師丹之戰。法兵十二萬。普兵二十四萬。是普倍於法也。其勝宜也。固不足爲普異也。顧論者謂法守而普攻。法爲主。普爲賓。是法易而普難。法逸而普勞。法有險阻可恃。城堡可憑。而普無所藉也。以

地利與兵數互較。似亦可以相等云。惟法不善守。而普則善攻。此法所以卒敗也。今以普法兩國兵數觀之。戰事方興。法國之兵六十四萬有奇。均有火器。餘勇四十一萬有奇。計戰兵一百有五萬。普國之兵五十萬。餘勇七十二萬。計戰兵一百二十二萬。普兵多於法十有七萬。初時擬兩國舉兵對壘。各不借資他國。則衆寡之數。猶可相當。迨後法國無助。而普則有南北日耳曼衆邦之援。北日耳曼兵三十一萬。餘勇五十五萬。計戰兵八十六萬。其中精銳騎兵九萬有奇。南日耳曼兵二十萬。餘勇之數未詳。統核普日所集之兵。先登衝鋒者一百萬。應援後勁者一百四十四萬。其衆於法。幾於一倍有半。若普之水師。則遠不逮法。法國戰艦林立。衝波涉浪。

而不畏。其卒皆百練之勁旅。故陸戰而勝不足奇。恐水攻則未能必勝也。至於普法所用火器。均以新法製造。奇巧之至。藥彈皆從後裝入。可以連環施放。神速罕倫。火器之長。勢均力敵。勝負之數。不繫於此。若其善用與否。則在乎人耳。雖有利器。必恃良將。否則利器亦成虛設。觀於普法之戰。而知火器之不可徒恃矣。普之勝法。在能合南北日耳曼爲一國。初法以南日耳曼密邇封疆。素申鄰好。必不助普。而不意竟與爲讐也。此法所不料也。蓋由法於平日間。高亢性成。恃強侮弱。屢肆侵凌。南北日耳曼之懷怨蓄憤。匪伊朝夕。則其助普者情也。夫固曰。今而後得反之也。而法猶未悟也。此法所以蹶也。普與南北日耳曼始合而終離。今由離而再合。離則

弱。合則強。不獨明者智者知其然也。果能壹志併力。聯
爲一國。雖縱橫於歐洲可也。豈第勝法已哉。故說者謂
勝法之利小。不如普日相合之利大。抑知普國之利。非
歐洲諸國之利也。普俄並雄。英法競爽。可以綱紀歐洲。
今弱一個焉。其將成鼎峙之勢乎。歐洲諸小國。其危哉。
土與俄鄰。壤與普接。一旦有事。英必不能救。坐成兩大
勢。實可憂。嗚呼。歐洲變局。將在今日。英其善自爲謀哉。

普法戰紀卷三

終

校合山田榮造

